



Il referents han dau plaid e fatg. Aschia era Pius Truffer che s'engascha cun success en Val Sogn Pieder.



Gian Gilli ha explicau la valor dad events da tuttas uisas.

FOTOS G. VENZIN

In forum per slargar il horizont

La giuvna combra d'economia e la promoziun economica han envidau alla secunda ediziun dil Forum Surselva

■ (ac) Cun vast horizont egl avegnir. Sut quei motto han passa 200 personas tedlau ils buns messadis purtai a caschun dil secund Forum Surselva el stabiliment dalla basa da helicopter il vendergis passau a Tavanasa. Tgi va dalla Val ora e tgi tuorna dalla Val anen? In dils referents engaschaus dil secund Forum Surselva, numnadamein Pius Truffer, interpredier a Val Sogn Pieder, ha fatg attent al capital human che banduna las Vals grischunas pilpli per adina. Attratgs dallas pusseivladads economicas empermettentas dalla Bassa che possibiliteschan d'ascender la scala professiunala pass per pass. In cass classic en quei senn ei bein Pierin Vincenz, carschius si ad Andia e che tgamuna oz la Banca Raiffeisen svizra. Malgrad ch'el ei restaus ella Bassa ha el nuota piars il contact cun sia patria pli stretga ed aschia era per la situaziun actuala. Ed el vesa ual potenzial avunda en sia vallada nativa per che quella possi dar damogn agl avegnir.

Mantenui il fried da nuegl

Mantener l'atgna identitad e s'adattar a novas situaziuns. En quei senn ha el commentau il svilup dall'interpresa ch'el tgamuna. Ina interpresa che hagi mantenui siu fried da nuegl e quei cun instradar differentas midadas. Inaga cun serrar las retschas organisatoricas internas e per l'auter cun far in pass els centers urbans. Pierin Vincenz ha fatg attent che la Banca Raiffeisen hagi fatg stem ch'els centers urbans schazegien il fried da nuegl dalla

Raiffeisen. Cuntercaussa fussi ei buca reussiu alla banca da s'establi en quels loghens aschi bein. «La Surselva sto far persenn che la concorrenza secatta buc ell'atgna regiun, mobein ordeifer.» Il directur dalla Banca Raiffeisen ha dau da ponderar da buc emblidar l'agricultura e l'economia forestala sco parts impurtontas dalla economia regiunala. Empau fastedis caschuna ad el il fatg ch'ei seigi pli e pli usus da finanzia e porscher garanzias per novs projects via il maun public, las singulas vischnaucas. Quei senza ponderar las consequenzas a liunga vesta.

Ir per turnar

Ida dalla Val ora e puspei turnada ei la referenta Urezza Famos e quei pliras ga. Ella ha bandunau l'Engiadina Bassa per studegiar economia a Turitg. Silsuenter ha ella tgamunau l'atgna interpresa en sia patria oriunda. Suenter haver vendiu quella interpresa eis ella serendida a Basilea per turnar cun il «Master of Advanced Studies in Arts Management». Ed ella ha priu en egl il vitg da Vnà. In vitget da biebein 70 habitonts che vala per in da quels loghens bulaus da posseder negina potenza, negin avegnir, «Alpenbrache» dil tuttafatg. Mo gest en quei liug vesa Urezza Famos in potenzial alpin ch'ella vul promover da cuminonza cun ulteriuras personas engaschadas e la populaziun da Vnà. Per quei intent ei vegniu fundau ina societad d'acziad ed ina fundaziun alla tscherca da daners per realisar a Vnà in hotel decentral. Urezza Fa-

mos ha relatau dallas stentas d'instradar in tal project. Buc il davos perquei che las instanzas politicas regionalas ein buca gest intimadas dad «Art Management». Tuttavia para il project dad esser sin buna via. Nuotatonmeins ha Urezza Famos appellau agl instinct digl interpredier e da prender a mauns sez il destin enstagl da promover la mentalitad che spetga ch'els daners roclan dalla Val en.

Agid da svilup ella Bassa

Era Gian Gilli ha relatau digl ir e turnar. Sia optica da quels fatgs ei denton empau outra. «Jeu haiel empriu miu 'business' el Grischun ed ussa porschel agid da svilup ella Bassa.» Gian Gilli che ha bandunau l'Engiadina ei denton perschadius che la gliued dalla Bassa tuorna en roschas, stunclentada dalla veta urbana da mintgagi. El che ha tgamunau a moda operativa il campiunadi mundial alpin a Sogn Murezzan ha explicau il nez general d'eveniments pli gronds. La valor vesa el buca ton ella sviulta finanzia beinvegnida. Gian Gilli ei perschadius ch'in tal eveniment muenta la gliued ed intimescha ella da s'engaschar per ina caussa e la fin finala per ina regiun. El vesa era per la Surselva grondas schanzas d'organisar eveniments pli gronds. Tenor siu avis sto quei buc esser exnum el sector dil sport, mobein leu nua ch'ina regiun sesenta cumpetenta e nua ch'ella posseda ses pli gronds potenzials.



Urezza Famos ei perschadida dils potenzials dallas valladas muntagnardas.



Marcus Levy ha dau suttetg era al secund Forum Surselva ed il promotur economic Pierin Vincenz (dretg) ei conorganisar digl eveniment.



Il Forum Surselva porscha la pusseivladad da scuntrar meinis. Per exempel davart la Porta Alpina



Discutar fa denton era seit.